

# In difese dal Friûl, no dai cjampanii

*La riforme dai Erdisu pensade de Region no convinç*

ANTONELLA LANFRIT

Prins a tignî alte la vuardie su lis prospetivis de gjestion dal dirit al studi cu la gnove idee de Region di inmanea une Fondazione in lûc dai doi Erdisu a son propit lôr, i students universitaris. Par chest a stan lavorant a un apontament public dulà che a frontaran la cuistion cu la metodologie di lavôr che si adate a students universitaris: no cjacaris, ma une analisi funzional dal dirit al studi e une analisi comparative dai doi organismis che cumò a lavorin in chest cjampanii: l'Erdisu di Triest e chel di Udin. Une iniziative che e rive daspò il prin resonament che e veve fat propit la rapresentance dai students dal Coordinament regional pe alte formazion dal Friûl-Vignesie Julie, sintûts i programs che e à la Region, cussì come che ju à presentâts l'assessor regional ae Istruzion e Università, Roberto Molinaro: une fondazion di partecipazion, tant a di un ent di dirit privât unic par dute la region, garantint la rapresentance dai student e i stes finanziaments regionai, se no di plui (11,5 milions tal 2011, confermâts tal 2012).

**I TRÊ DUBIS DAI STUDENTS** – Dut cás, a son trê lis perplessitâts mostradis propit dai students in forme unitarie, ven a stâi tant chei di Udin che chei di Triest: la funzion dai privâts te Fondazione; il fat che si è in spiete di une gnove normative nazional in fat di dirit al studi; la unificazion teritoriâl de gjestion



La retore Cristiano Compagno intun dissen di Gianni Di Lenia

dal dirit al studi. «Achi no je cuestion di difindi cjampanii – a àn sotliniât – si trate invezit di tignî ben presint che lis necessitâts locals a son diferentis tra Udin e Triest, par vie che ogni realtât e à lis sôs peculiaritâts, che a riscjin di no jessi consideradis ad implen intune situazion amministrative unificate». In sumis, ur pâr al è che i doi Erdisu a àn mecanisim di funzionament diferents par vie che difarent al è il criteri di gjestion. Par chest a son modei dificilmentri standardizabii, si ben

che in di di vuê a conventin razionalizacions.

## LA PERPLESSITÀ DE COMPAGNO

Dal retôr di Udin, la professoressa Cristiano Compagno, nissun prejudiz ideologic in mert al dissen regional e nancje a programs di razionalizazion, come che par altri e dimostre la sò azion in chescj agns ae Università di Udin. Lis sôs a son osservacions che a partissin de analisi dal proget come che al è stât presentât: «Il dissen juridic di chest sogjet di dirit privât che al metarès in cubic i doi Erdisu nol è clâr e nancje i problemis economics-strategjics che al varès di risolvî», e spieghje. E po e zonte: «In ogni procès di razionalizazion, prin si definissin a clâr i obietifs economics-strategjics, po si fasin lis simulacions di ce che al varès di diventâ e su chestis fondis si decîs». Si che duncje, in chest moment, «stant la inciertee funzional e strategjiche dal proget de Fondazione o pant lis mès perplessitâts, par vie che no viôt a clâr. O viôt invezit benon – e continue – i potenziâi pericul di une uniche Fondazione, in mert ae aderenca a lis esigjencis specifichis dai students de Università di Udin, al vignî al mancual de sinergie tra l'Erdisu e la Università, sedi par i servizis imobiliars, sedi par chei ae persone e in definitive il pericul di cäl de cualtât dai servizis pai nestrîs students». Cun di fat, i servizis leâts al dirit al studi a son come un vistit di un sartôr: a àn di jessi su misure e chest al compuarte une contiguitât tra l'organism che ju eroghe e la Università e une operativitât sul teritori.

**FONTANINI CUNTRI DE FONDAZION UNICHE** – De bande de politiche, il president de Provincie di Udin si è pronunciât a favôr de Fondazione, ma al à metût un "alt" ae Fondazione uniche: «Une sole no va ben, e convene une par ogni Università – al conferme –, A son difarentis e si scuèn difindi la autonomie di ognidune e des lôr diferencis, si no a saltin fûr dome pastiei. E stant che o savin cemût che son ladis lis robis pal passât, o dis in anticip: vonde penalizâ il Friûl». ■